

Educazion plurilengâl tes scuelis furlanis

ALESSANDRA BURELLI *

Ristret. Il contribût al presente i elements e al discut lis risultancis di un proget di ricerche educative e glotodidatiche indreçât a realizâ esperiencis-pilote di insegnament/aprendiment de lenghe furlane inte prospetive de educazion plurilengâl. Lis attivitàs educativis sperimentâls, realizadis in 3 scuelis de infanzie e 3 scuelis primariis des provinciis di Pordenon e Udin, a integrin i insegnamenti linguistics in percors tematici o laboratoriâi che a interessin anche areis dissiplinârs no linguistichis, e a svilupin une didatiche linguistiche integrate e indreçade dal contignût. I percorsi plurilengâi a son realizâts cun classis/grups di fruts di diviers nivel di scolarizazion, a son coordenâts cui obietîfs curiculârs stabiliti de scuele e a cijapin dentri la lenghe furlane sicu element che al inricjîs e al potenzie il curiculum. Lis strategiis didatichis adotadis a promovin e a favoris sin la riflession e il confront interlinguistics come strumenti di disvilup di ateggiamenti positîfs viers la diversitât e la alteritât.

Peraulis clâf. Educazion plurilengâl, scuele de infanzie e primarie, lenghe furlane, modei curiculârs plurilengâi.

1. Introduzion. L'interès di ricerche pe educazion bi-plurilengâl cu lis lenghis minoritariis e la sperimentazion di modei e praticis didatichis che lis atualizin tal percorsi di istruzion a tocjin in maniere significative la scuele dal Friûl fin dai agns Otante. A metât di chei agns a si inviin dôs impuantantis esperiencis educativis in Provincie di Udin: la scuele de infanzie bilengâl sloven-talian a San Pieri dal Nadison, che e nas pe volontât di un grup di gjenitôrs li dal Študijski Center Nediža (Gruden Cri-

* Dipartiment di Lenghis e Leteraturis Forestis, Universitât dal Friûl, Udin, Italie.
E-mail: alessandra.burelli@uniud.it

setig 2001), e il progetto pilote di educazion bilengâl furlan-talian intes scuelis de infanzie di Gjian e di Trep Grant, elaborât li de Universitât dal Friûl e finanziât de Comission Europeane (Schiavi Fachin 1998). La propueste educative di dutis dôs lis iniziativis e je cualificade di un strent riferiment a la ricerche scientifice internazionâl sul bilinguisim e la educazion bilengâl (Siguan e Mackey 1986, Cummins e Swain 1987), su la acuisizion de seconde lenghe (Dulay, Burt e Krashen 1982) e sul insegnament des lenghis (Wilkins 1976). Su chestis fondis si poie la sielte dai modei organizatîfs, la descrizion e la selezion dai contignûts linguistics educatîfs, la projetazion des ativitâts e la adozion di modalitâts didatichis misuradis su la competence comunicative e il disvilup cognitîf dai fruts (Schiavi Fachin 1991; Burelli 1996, 1998a).

I studis sientifics tai setôrs a pene dits a vuidin ancje la projetazion e la realizazion, tra il 1992 e il 1997, di ativitâts educativis plurilengâls che a cjapin dentri lis lenghis locâls in trê localitâts aloglotis de Provincie di Udin: Timau e Sauris, dulà che si fevelin dôs distintis varietâts gjermanichis, e Val di Resie, là che si fevelin varietâts sclavis. Denominatôr comun di chestis e des iniziativis di educazion bilengâl nomenadis prime al è l'obietîf di sostignî e valorizâ il plurilinguisim natîf dai fruts che a vivin in Friûl, indreçant i fruts e lis lôr comunitâts a cjapâ cussience de ricece dal lôr repertori linguistic, a preseâlu e a fânt lis fondis di une competence plurilengâl e di un repertori linguistic plui amplis.

Ancjemò in dì di vuê a son massime il quadri teoric e lis sieltis gloto-didatichis dal progetto di educazion bilengâl furlan-talian (Burelli 2001) a vê rilevance pes scuelis de Region Friûl Vignesie Julie che si impegnin a integrâ l'insegnament/aprendiment de lenghe furlane tal curriculum. Lis nozioni di bilinguisim aditîf, di competence linguistiche comunicative, di ûs veicolâr de lenghe, lis modalitâts didatichis une persone-une lenghe, une situazion-une lenghe a son cognossudis e cjapadis di riferiment di gran part dai insegnants des scuelis pre-primariis e primariis de Region, ancje se no simpri a rivin a jessi tradusudis in esperiencis educativis coerentis.

La aprovazion de leç statâl di tutele des minorancis linguistichis storichis (Parlamento Italiano 1999), la difusion dal *Common European Framework of Reference for Languages* (CEFR) (Council of Europe 2001), la publicazion des *Indicazions pe programazion didatiche curiculâr daûr de*

leç 482/99 (OLF 2004), la aprovazion de leç regionâl di tutele de lenghe furlane (Consiglio Regionale 2007) tai ultins cuindis agns a àn sburtât simpri plui scuelis de infanzie e primariis a progetto esperiencis di insegnament/aprendiment de lenghe furlane. Tai stes agns la Universitât dal Friûl e à realizât impuantantis e inovativis iniziativis formativis paï insegnants di lenghe minoritarie, che a àn sburtât a cjakâ in considerazion simpri plui la prospetive de integratzion de lenghe regionâl tal curriculum e a atuâ esperiencis orientadis aes finalitâts de educazion plurilengâl, val a dî il disvilup de competence plurilengâl dai fruts (plurilinguisim come competence) e la sensibilitât e il rispiet pe diviersitât des lenghis e des culturis che ur son associadis (plurilinguisim come valôr) (Beacco 2007).

2. Il program di ricercje. In spiete dal regolament atuatîf de leç regionâl 29/2007 la Agjenzie Regionâl pe Lenghe Furlane - ARLeF e à promovût doi studis par furnî lis scuelis di esemplis e modei di organizazion curiculâr plurilengâl che a cjakin dentri l'insegnament/aprendiment de lenghe furlane. Il program denominât *Projeti pilote di educazion bi- plurilengâl inte scuele de infanzie e primarie*¹, ogjet di cheste comunicazion, al è stât realizât li dal Centri Interdipartimentâl di ricercje su la culture e la lenghe dal Friûl - CIRF de Universitât dal Friûl tal periodi setembar 2010 - jugn 2012.

La vore di ricercje si è impegnade a profondî e contestualizâ nozions e principis teorics elaborâts de ricercje scientifice tal setôr de educazion linguistiche e fats bogns de politiche educative europeane; a sperimentâ formis organizativis che a includin in maniere sistematiche la lenghe furlane tal curriculum scolastic tignint cont des risorsis materiâls e professionâls disponibilis; a proponi modalitâts didatichis e indicazions operativis par struturâ il procès di istruzion in funzion de educazion plurilengâl e interculturâl. Lis ricercjadoris² a àn concentrate la atenzion su lis pussibilitâts di configurâ la lenghe furlane come ‘lenghe di scolarizazion’, val a dî strument di insegnament/aprendiment dongje de lenghe taliane, e come ‘lenghe de educazion’, val a dî element organic dal curriculum come la lenghe taliane e la lenghe foreste (Coste, Cavalli, Crișan e van de Ven 2009: 28).

Inte suaze de politiche linguistiche europeane la educazion plurilengâl e interculturâl e à doi fins. Di une bande e favoris l'aprendiment

di abilitâts linguistichis e interculturâls inricjint i repertoris individuâi di gnovis risorsis linguistichis e culturâls. Di chê altre e promôf il disvilup personal di ogniu, promovint il rispiet e la acetazion des diferencis linguistics e culturâls intune societât multiculturâl e multilengâl e judant a sei consapevui des propriis competencis e des propriis potenzialitâts (Beacco *et al.* 2010: 18).

La progetazion di modalitâts educativis par une educazion plurilengâl e interculturâl e une educazion di cualitât e aceté il principi che al è ancje dal Consei de Europe, che dutis lis lenghis a àn valôr, il stes valôr, “indipendentementri dal lôr status e dal lôr pês te societât e dentri tal Stât” (Beacco *et al.* 2010: 96). Une progetazion educative che si fonde su chescj principis e da a la scuele furlane un obietîf alt: mantignî e disvilupâ la diviersitât linguistiche e culturâl mediant l’insegnament de e inte lenghe minoritarie. La inclusion sistematiche de lenghe furlane tes aktivitâts educativis e cjape la funzion di promovi e rinfuarçâ la identitât dai fruts furlanofons tant che fevelants une lenghe minoritarie e di fâ rifleti ducj i fruts su la diviersitât linguistiche e culturâl. Ae scuele si fide il compit di valorizâ e di disvilupâ la lenghe furlane dal frut che le à za tal so repertori, ma ancje chel di pandi e fâ preseâ cheste fevelade ai fruts che no le cognossin e di slargjâ il lôr repertori.

Il curriculum par une educazion plurilengâl e interculturâl che il program di ricercje al à smirât di meti in vore tes classis partecipantis al cjape sù e al valorize il repertori de comunitât dentri e fûr de scuele, lu met a disposizion di ducj i fruts e al favoris une ‘educazion linguistiche globâl’ mediant dal cjapâ cussience, tant che di un tesaur, de pluralitât e de diviersitât linguistiche e culturâl te classe e dulintor, cu la finalitât di favorî ategjaments positîfs e vierts tai confronts de alteritât. La lenghe minoritarie e je element di inricjiment dal procès educatîf e la sô presin- ce tal percors di istruzion e puarte a vê atenzion ae funzion dal disvilup linguistic te madurazion culturâl, mediant dal contat cu lis diferencis simbolichis, concetuâls e sociâls che a esistin tra lis lenghis.

Il program di ricercje nol à intindût proponi une uniche modalitât organizative curiculâr, compagne par dutis lis classis partecipantis. Sevi il CEFR (cjap. 8), sevi i documents sucessîfs adotâts dal Consei de Europe e dedicâts specificementri ae cuestion de implementazion de educazion plurilengâl e interculturâl, a clamin la atenzion dai atôrs de progetazion

curiculâr a adatânt la forme e il grât di integrazion al specific contest educatîf e socioculturâl. La indicazion dal Organism European e je in linie cui studis su la adeguatece e efficacie des opzions curiculârs bi-plurilengâls adotadis in País e contescj culturâi differents (Baker 2006, Garcia 2009). Pluitost che proferî un scheme di aplicâ, si à intindût duncje cirî di fâ saltâ fûr des scuelis lis pussibilis formis di realizazion de educazion plurilengâl e interculturâl. Si à stimât cussì di podê lavorâ ancje in presence de continue evoluzion di normis e disposizions statâls e regionâls che a incidin sul funzionament des scuelis vuê in Friûl; normis e disposizions che a clamin i docents a un impegn istituzionâl simpri plui complès e articolât par rispuindi a la domande educative di un numar crescenti di fruts cun profii culturâls e linguistics diviers e complès, e a compuartin un lavôr grivi a cause di risorsis finanziariis, strumentâls e umanis simpri plui ridotis.

Assumint che il curriculum al è strument di organizazion dal apprendiment (Beacco *et al.* 2010: 12), lis ricercjadoris a àn elaborât il projjet didatic par ogni grup sperimental clamant lis insegnantis a jessi co-autoris dal projjet stes. Lis ricercjadoris a àn metût a disposizion des docentis nozioni teorichis e cognossincis pratichis poiadis de ricerche scientifice; lis insegnantis a àn proferît lis lôr competencis didatichis, la cognossince de classe e dai fruts che a varessin partecipât, la cognossince dal ambient sociâl e dal contest istituzionâl de scuele. Insieme ricercjadoris e insegnantis a àn cirût la pussibilitât e lis modalitâts di realizâ esperiencis educativis didatichis di cualitât e sostignibilis te cuotidiane realtât di ogni classe. Al centri di ogniu dai sis projjets si àn metudis lis dibisugnis dai fruts, di cressite e di apprendiment, come individuis e come membris de societât, declinantlis su la divierse realtât dai grups sperimentâls: la etât, lis competencis linguistichis za madressudis, lis condizioni e lis eventuâls dificoltâts di apprendiment dai fruts. I obietîfs, i cognitîvs, lis modalitâts operativis a son stâts definîts a partî de nozion di competence plurilengâl e interculturâl cussì come che e je definide tal CEFR (cjap. 6 e cjap. 8) e come che le analize la ricerche sul plurilinguism e la educazion plurilengâl e interculturâl (Cook 2002, Abdallah-Petcille 2003, Zarate, Levy e Kramsch 2008, Auer e Wei 2009, Kramsch 2009).

Struturâ il curriculum par realizâ une educazion plurilengâl e inter-

culturâl al domande di orientâsi viers principis organizatîfs e metodologjiis che a cirin formis di integratzion e che a smirin a fâ risaltâ aspiets trasversâi e a viodi in maniere plui globâl e di economie curiculâr il dîsvilup des capacitâts linguistichis e culturâls (Coste, Cavalli, Crișan e van de Ven 2009). Si domande di superâ la separazion tra i insegnaments des lengthis de educazion e chê tra insegnaments linguistics e chei des altris dissiplinîs, viodint lis lengthis come realizazion plurâl de facoltât dal lengaç e strument fondamentâl di elaborazion des cognossincis, de madurazion personal e des relazions sociâls. A chest fin il program di ricerche al à indreçât particolâr atenzion a elaborâ e meti in vore formis di coordenament e di cooperazion tra i insegnants des trê lengthis dal progetto, a previodi moments di negoziazion tra di lôr e a gjestî lis formis di complementaritât tra lis attivitàts.

3. Sogjets. Il program sperimentalâl al è stât realizât in 6 scuelis statâls, 3 de infanzie e 3 primariis, e al à coinvolt 7 classis par un total di 128 fruts (Tabele 1).

Lis scuelis che a àn implementâts i projets a son situadis in areis dal Friûl diviersis par colocazion gjeografiche e realtât economiche, sociâl e linguistiche. La scuele de infanzie “Marin” di Cjasiât e la scuele primarie “D. Cernazai” di Travêz a son in Provincie di Pordenon, la part plui occidental de region e de aree furlanofone, ai confins cul Venit. Cjasiât, frazion dal comun di Vít (843 abitants), al è poiât te val dal Arzin e al conte plusôrs insediamenti industriâi e artesanâi che lu àn rindût atratîf par un bon numar di migrants (Romanie e Burkina Faso i Paâs di divignince plui rapresentâts). La scuele de infanzie di culì e je frequentade di buine part dai fruts dal comun di Vít e e à une sole sezion. Travêz, cjâf lûc di comun (1.814 abitants) pôc plui a ovest di Cjasiât, al presente une realtât economiche fate ancje chê di iniziativis artesanâls e insediamenti industriâi. La scuele primarie di Travêz e je a temp plen e e je frequentade di ducj i fruts dal comun. Ancje in cheste scuele a son presints plusôrs fruts di fameis migrantis; chei che a fasin part de classe sperimentalâ a vegnin dal Burkina Faso e de Albanie. Sevi a Cjasiât che a Travêz si fevele furlan tes variantis locâls che si insuazin te varietât dal furlan occidental (Francescato 1970).

Lis 4 scuelis restantis a son dutis in Provincie di Udin. Une des dôs

Tabele 1. Grups coinvolti te sperimentazion.

<i>Grât scolastic</i>	<i>Scuele</i>	<i>Classe/grup</i>	<i>N. di fruts</i>
Scuele de infanzie	<i>Marin, Cjasiât</i>	monosezion	19
	<i>C. Collodi, Madrîs di Feagne</i>	mezans e grancj	32
	<i>Amicizia Mantovana, Trep Grant</i>	grancj	15
Scuele primarie	<i>D. Alighieri, Faedis</i>	5^	19
	<i>D. Cernazai, Travès</i>	3^	26
	<i>G. Carducci, Udin</i>	1^	16

primariis, la scuele “G. Carducci”³, e je a Udin, te zone nord de citât. Tes sôs 9 classis e ricêf i fruts che a son a stâ in cheste part de citât che pôc plui inlâ e viôt vierzisi une zone comerciâl tra lis plui impuantantis de region. Udin (99.627 abitants, 13.488 forescj; dâts 2010), centri di une aree economicementri vivarose, al è ancje centri culturâl impuantant par dut il Friûl. In merit ae situazion sociolinguistiche, il storic repertori trilengâl de citât, che al cjape dentri la lenghe taliane, il venit udinês e il furlan (Francescato 1982), in dì di vuê al mostre l'avanzament fuart dal talian tai diviers contescj sociâi e il so ûs prevalent di bande des gjenerazions zovinis, e la presince di plui lengthis di migrazion introdotis dai citadins di Pais forescj.

La scuele primarie “D. Alighieri” di Faedis⁴, comun furlanofon di cirche 3.000 abitants, situât a est di Udin e no lontan dal confin cu la Slovenie, e je frequentade dai fruts dal païs e des localitâts dulintor. La struture economiche di Faedis, poiât sul ôr dai cuei orientâi, e je prevalentemente agricule e caraterizade di une preseade produzion vinicule. Te comunitât al è ben vîf l'us de lenghe furlane sevi te comunicazion familiâr sevi in chê publiche.

La scuele de infanzie “Amicizia Mantovana” di Trep Grant⁵, za coinvolte tal progetto pilote di educazion bilengâl furlan-talian za dit, e à dôs sezions che vie pes ativitâts educativis si organizin in grups omogjenis par etât. I fruts che le frequentin a son a stâ a Trep Grant e tes cinc frazions dal comun omonim (1.765 abitants). Comun de pedemontane furlane subit a nord di Udin, dongje des principâls stradis di comunicazion cu la Austrie, Trep Grant al à une tradizion furlanofone ancjemò vive; sevi in famee, sevi tes interazions tra compaesans la comunicazion e je prevalentementri par furlan.




Figure 1. Furlan e altris lenghis di cjase tra i fruts des classis sperimentâls.

La scuele de infanzie “C. Collodi” di Madrîs⁶ e je une des dôs scuelis de infanzie statâls dal Comun di Feagne (pôc plui di 6.600 abitants) che si cjate subit a ovest di Udin, sul imprin dai cuei morenics. Il contest so-ciâl de scuele al presente une strutture economiche vivarose peade ai setôrs de agriculture, dal cumierç e dai servizis. A Feagne al à sede il Mu-seu de Civiltât contadine “Cjase Cocol”, un dai plui impuantants museus etnografics de region. La lenghe furlane e je doprade ancje in situazions e contescj publics.

Stant ai dâts cjapâts sù mediant dal cuestionari compilât dai gjenitôrs, des trê lenghis cjapadis in cont come lenghis di scolarizazion tai percors sperimentâi plurilengâi, te maiorange dai câs il talian al è la uniche lenghe di comunicazion cui/dai fruts sevi a cjase che a scuele; il furlan al è fevelât di pôcs, in cualchi ocasion e/o cun parincj, e l’inglês al è doprât di ducj nome a scuele, tes ativitâts dedicadis. Par tant che al rivuarde la lenghe furlane, la plui part dai fruts (84%) ind à almancul une competence ricetive. 24 fruts (19%), dongje o tal puest de lenghe taliane a cjase, a doprin “lenghis di migrazion” (Beacco *et al.* 2010). La distribuzion di chescj fruts tes classis sperimentâls no je omogjenie; e va di un unic frut tes dôs sezions de scuele de infanzie di Madrîs ai 7 te monosezion di Cjasiât. Di chescj 24 fruts, 8 a òn ancje une competence ricetive de lenghe furlane (Figure 2).

Lis ativitâts sperimentâls a son stadiis realizadis di 10 insegnantis⁷ che




Figure 2. Lenghe furlane tra i fruts che a fevelin altris lenghis a cjase.

a àn dât la disponibilitât a partecipâ al program di ricercje e a àn fat puest al progetto plurilengâl te attivitàt educative che ur jere fidade tes classis. 4 insegnantis a vevin za collaborât cui ricercjadôrs, vint partecipât a pluroris iniziativis di formazion inmaneadis de Universitât di Udin; dutis a vevin atuât o collaborât a realizâ originâi percors educatífs di/in lenghe furlane tes lôr scuelis. Dutis lis insegnantis a vevin competence de lenghe furlane e a dopravin la lenghe taliane tai insegnamenti dissiplinârs; 5 a puartavin indevant ancje lis attivitàts/l'insegnamento de lenghe inglese.

4. Metodologje. Il program di ricercje si è davuelt in doi timps. Tra settembar e dicembar 2010 ricercjadoris e insegnantis a àn deliniât i projets didactics e ju àn presentâts ai gjenitôrs resonant cun lôr su lis finalitâtis educativis, i contignûts di istruzion e lis modalitâtis didatichis che ju caraterizavin. Cun incuintris tes scuelis, si àn analizadis lis attivitàts di/par furlan che i insegnants za a davuelzevin, metint in evidence i elements di contignût e lis pratichis didatichis che, in maniere intuitive e episodiche, lis caraterizave tal sens de educazion plurilengâl, e si à cjapât cont dai problemis e des dificoltâtis che si ur leve incuintri lavorant cun fruts che a vevin diviers grâts di competence dal furlan ma ancje dal talian. Dongje di chescj moments finalizâts a fâ risaltâ e rinfuarçâ la lôr competence didatiche, lis insegnantis a àn partecipât a un seminari di

studi vuidât de responsabile scientifice li de Universitât, destinât a judâlis a profondî e sistematizâ lis cognossincis teorichis su la educazion plurilengâl. I temis frontâts a àn dât maniere di analizâ cun atenzion lis trasversalitâts pussibilis tra i insegnaments des lenghis taliane, furlane e inglese; di studiâ lis manieris di creâ une coherence tra chescj insegnaments; di esaminâ i ambiti dissiplinârs che chescj insegnaments a varessin podût tocjâ; di stabili lis formis di colaborazion tra i insegnants des diviersis lenghis e dissiplinis; di individuâ i modei organizatîfs praticabii, a partî di chei definits tes *Indicazions...* (OLF 2004) e di contestualizâju tignint cont dai projets e des ativitâts presints tes scuelis. I risultâts di chestis riflessions, intun cui dâts no ancjemò disponibii tal imprin dal an scolastic, à an judât a meti a puest i disens progettoi e a puartâju a la formulazion definitive. Ogni progetto al è stât presentât ai Orghins didactics e aministratîfs scolastics che lu àn aprovat e lu àn includût come progetto de scuele tal program anuâl dal Plan de Uferte Formative.

Lis ativitâts educativis si son inviadis in ogni scuele a metât zenâr 2011 e a son ladiis indevant fin ae fin di mai; il mês di jugn al è stât do-prât par meti adun la documentazion des ativitâts didatichis davuelts dai grups/classis. Lis insegnantis a son stadis seguidis de ricercjadore⁸ tal da-vuelziment dal progetto mediant di incuintris periodics te lôr scuele. Oltri che monitorâ l'andament des ativitâts, la ricercjadore e à frontât lis cuistions didatichis che si presentavin e judât a risolvilis, proferint criteris e indicazions operativis. Lis cuestions plui griviis lis à discutudis cu la responsabile scientifice e e à ripuartât aes insegnantis lis osservazions e indicazions madressudis in chest confront.

Lis insegnantis a àn predisponût il lôr plan di lavor daûr di un sche-me comun, proponût des ricercjadoris tant che strument par descrivi e articolâ lis condizions e i elements dal progetto educatîf in tiermins di:

- insegnants e insegnaments coinvolts;
- model organizatîf adotât;
- modalitât didatiche pes ativitâts par furlan;
- obietîfs e contignûts linguistics specifics par lis dôs/trê lenghis;
- obietîfs e contignûts dissiplinârs no linguistics;
- modalitât di integratzion tra i aprendiments linguistics;
- metodologjiis didatichis utilizadis;
- timp dedicât al insegnament-ûs de lenghe furlane.

Lis ricercjadoris a àn ancie elaborât il cuestionari che lis insegnantis a àn doprât par verificâ cualis che a jerin lis lengthis presintis tal contest familiâr e amicâl dai fruts, cualis che i fruts a dopravin e cun cui.

5. Risultâts e discussion. I dâts osservatîfs metûts adun de ricercjatore tal cors des visitis periodichis tes scuelis e la analisi de documentazion des attivitàs educativis realizadis (Cantarutti 2011) a mostrin sîs esperiencis educativis che a recepissin lis finalâts e i principis de educazion plurilengâl e interculturâl e int fasin lis coordenadis par la inclusion de lenghe furlane tal curriculum. Confrontant i projets tra di lôr si rilevin trats comuns dongje di elements di diversitât e di origjinalitât. I elements di differenziazion principâi a son riscontrabii te etât, repertori linguistic e grât di competence de lenghe taliane e di chê furlane dai fruts, tal numar des insegnantis e dissiplinis coinvoltis, tes sieltis organizativis.

I trats comuns che si pue din rilevâ a son:

- il coordenament dai insegnaments linguistics;
- la integratzion dai insegnaments/aprendiments linguistics cun contignûts no linguistics;
- l'ûs veicolâr dal furlan integrât cui obietîfs di disvilup de competence linguistiche;
- l'insegnament/aprendiment dal furlan vuidât dal contignût (*content-based teaching*, CLIL);
- la valorizazion dal rinfuarç che lis lengthis si dan une cun chê altre;
- la riflession sui aspiets formâi des diviersis lengthis;
- la atenzion ae inclusion e ae interculturalitât;
- la adozion di metodologjiis didatichis che a valorizin la cooperazion e la negoziazion e che a ativin strategjiis cognitivis e creativitât.

Lant un pôc plui in profonditât, si rileve che in dutis lis attivitàs lis insegnantis a àn integrât elements di sensibilizazion aes lengthis che a puartasson i fruts a cjapâ cussience des relazions di parintât o des distancis tra la lenghe furlane, chês taliane e inglese e chês altris lengthis presintis te classe; a àn cirût di ativâ lis competencis linguistichis trasversâls dai fruts dant risalt a lis strategjiis di aprendiment; a àn adotât metodologjiis comunis pes trê lengthis, che a àn definidis in relazion aes competencis comunicativis trasversâls. Lavorant cui fruts plui piçui a àn valorizât la discuvierte spontanie di ecuivalents lessicâi e di elements fonetics e a àn so-

lecitât la ricercje di chescj elements tes varietâts linguistichis – lengthis forestis, lengthis minoritariis de region, dialets, lengthis di migrazion – che i fruts a cognossevin. Lis riflessions interlinguistichis dai plui grancj si son slargjadis aes formis sintatichis e modalitâts discorsivis e a ãn cjapât dentri ancie lis formis scritis. In ogni progetto si à metût in at une ‘didatiche integrate des lengthis’ (Coste, Cavalli, Crișan e van de Ven 2009: 118-124) ancie adotant la alternance des dôs/trê lengthis in funzion de strutturazion di concets e cognossincis e proponint attivitàs di mediazion tra discors in lengthis diviersis par tornâ a esprimi esperiencis e a formulâ cognossincis e concets.

Lis attivitàs davuelts a presentin un bon grât di coherence e coordinament a nivel di modalitâts didatichis, formis linguistichis e contignûts. Stant che in ogni realtât sperimentalâ une insegnante e disvilupave il percors in dôs o dutis trê lis lengthis, chescj trats a son comuns, ma a son evidents massime tes attivitàs realizadis tes scuelis de infanzie. Il fat che tal quadri curiculâr de sô scuele ogni insegnante e ves la responsabilitât dal insegnament de lenghe taliane o/e de lenghe inglese al risulte la variabile che e à puartât in dutis lis situazions sperimentâls a integrâ la lenghe furlane tal curriculum de classe/grup cu la modalitât ‘une situazion-une lenghe’ (Tabelis 2 e 3).

Par 2 classis de scuele primarie e 2 grups de scuele de infanzie la organizazion des attivitàs educativis dal progetto e cjape di riferiment il model de “unitât di lavor plurilengâl” (Burelli 1998b, OLF 2004) e e pee la programazion dai aprendiments linguistics a un teme interdissiplinâr che al à rilevance tal contest cuotidian di vite e che al fâs risaltâ l’agjî social e la relazion dal om cul ambient naturâl. In doi contescj, 1 di scuele de infanzie e 1 di scuele primarie, lis attivitàs di lenghe furlane si configurin di plui come percors laboratoriâi. I frutins de scuele de infanzie di Trep Grant a imparin il furlan instant che lu doprin, disegnant e piturant. Te classe 1[^] de scuele primarie “G. Carducci” di Udin si dopre e impare la lenghe furlane lant a scuvierzi ambients e animâi vuidâts dal Orsut Tobie.

La jentrade in sene dal Orsut Tobie e de siarpe rosse de mestre pai fruts di Udin, il tapêt e la polvarine dorade pai fruts di Madris, i braçalents pai fruts di Cjasiât, il carel cui pinei e i colôrs pai fruts di Trep Grant à son i mediatôrs che, intun cul metisi sentâts a semicercli o cu la de re-

Tabele 2. Elements de organizazion curiculâr dai projets des scuelis de infanzie.

Scuele de infanzie	Grup	Insegnants	Dissiplinis	Titul dal progetto	Model organizatîf	Integrazion de lenghe furlane	
						Modalitât	Temp
Cjasiât	mono-sezion	2	talian inglês sciencis	Il bosc	unitât plurilengâl	une situazion -une lenghe	120'
Madris	grancj e mezans	1	talian sciencis	Une storie pal ambient	unitât plurilengâl	une situazion -une lenghe	60'
Trep Grant	grancj	1	talian art	Dal trat al ritrat	laboratori	une situazion -une lenghe	75'

Tabele 3. Elements de organizazion curiculâr dai projets des scuelis primariis.

Scuele primarie	Classe	Insegnants	Dissiplinis	Titul dal progetto	Model organizatîf	Integrazion de lenghe furlane	
						Modalitât	Temp
Faedis	5^	3	talian inglês sciencis	Luce - Lûs - Light	unitât plurilengâl	une situazion -une lenghe	70'
Travêș	3^	3	talian inglês sciencis	Il pane - Il pan - Bread	unitât plurilengâl	une situazion -une lenghe	60'
Udin	1^	1	talian storie gjeografie	Ator dal Orsut	laboratori	une situazion -une lenghe	60'

cite di une formule, a introdusin l'ûs de lenghe furlane tes ativitâts educativis. Chestis strategiis, che a interpretin e a adatin elements dai metodis di insegnament des lengthis forestis (Taeschner 2003, Artigal 2005) usâts ancje des insegnantis sperimentadoris a Trep Grant e a Madrîs par insegnâ la lenghe inglese, no son dopradis cui fruts plui grancj (8-11 agns); par lôr a son l'argoment e l'orari stabilît pes ativitâts dal progetto a selezionâ la lenghe di comunicazion e di studi.

Tes ativitâts didatichis, massime in chêis veicoladis de lenghe furlane, si à fat une vore di atenzion a no blocâ i tentatîfs dai fruts di esprimisi e di comunicâ contignûts personâi e di cognossince ancje cuant che no conossevin avonde la lenghe. Si à acetât il passaç di une lenghe a chê altre

(*code switching*) cuant che il frut al veve dificoltât a lâ indevant e no si àn sanzionâts i enunciâts miscliçâts (*code mixing*). Vâl a dî, si à ricognossût chestis manifestazions linguistichis come modalitâts comunicativis naturâls e specifichis de persone che e cognòs a cualchi nivel e e dopre plui di une lenghe (Cook 2002, Grosjean 2010); si ju à lets come fenomens carateristics e normâi dal disvilupâ e imparâ une gnove lenghe (L2) (Doughty e Long 2003, Auer e Wei 2009) e si à preseât e acetât il sfuarç e la intenzion dal frut proferintji une riformulazion dal so messaç in lenghe furlane. Dispès tes ativitâts struturadis cu la lenghe furlane si àn doprâts materiâi plurilengâi metûts adun di pueste dai insegnants; a àn ciatât puest zûcs di peraulis interlinguistics; si àn adotadis modalitâts didatichis atentis ae dimension linguistiche te elaborazion e apropiazion di contignûts di cognossincis (*language-sensitive approach*).

Se si acetè che l'element centrâl te educazion plurilengâl e interculturâl a son i leams tra lis lengthis-dissiplines (Beacco *et al.* 2010: 11), si pues dî che i sîs percors educatifs realizâts a son sigûr esemplis, circoscrits e situâts, di educazion plurilengâl e interculturâl e che la lenghe furlane indi è part organiche e no marginâl. In chescj projets al furlan si atribuìs la part di lenghe di imparâ (dissipline) e lenghe par imparâ (veicolâr), dongje dal talian (dissipline e veicolâr) che al è la lenghe principâl di scolarizazion, e si i da chê visibilitât che e covente ai fruts che lu fevelin par rinfuarçâ la autostime e la imagjine di se come siei locutôrs. La didatiche de lenghe furlane, vint di misure lis competencis e lis cognossincis dai fruts, e dose moments monolengâi e moments cun modalitâts bi-pluri-lengâls. Cussì insedade tes ativitâts educativis la lenghe regionâl e da mût ai fruts che ind àn cualchi cognossince di consolidâ e disvilupâ lis competencis linguistichis comunicativis di comprension e produzion orâl, e ai i fruts plui grancj anche chês di comprension e produzion scrite; e da ocasion ai fruts che no le cognossin di slargjâ cun jê il lôr repertori linguistic; e cjape part al disvilup di competencis linguistichis trasversâls; e jude a acuisî strategijs che a permetin di passâ di une lenghe a chê altre te comunicazion; e fas puest al disvilup di ategjaments positifs tai siei confronts; e da valôr ae diversitât des lengthis de classe; e jude a percepî che lis lengthis a puartin cun se valôrs culturâi; e puarte a acuisî cognossincis culturâls.

Tra lis condicions e risorsis che a àn zovât pai risultâts positifs dai projets, la part fondamentâl le à vude la professionalitât des insegnan-

tis e in particolâr la lôr solide formazion linguistiche e glotodidatiche. Dîs mês par projetâ e implementâ une sperimentazion educative intune scuele a son un temp pardabon une vore curt. Su la fonde des ricercjis internazionâls (Kelly e Grenfell 2004) e de esperience madressude tes ricercjis educativis citatis al inizi di chest contribût, lis ricercjadoris a àn considerât indispensabil ciatâ la colaborazion di insegnantis che si cognosseve la lôr preparazion e la cualitât dal lôr insegnâ par puartâ a bon fin il studi tai temps stabilîts.

Intun progetto di (ri)organizacion curiculâr par une educazion plurilengâl e interculturâl, lis variabilis di incrosâ a son tantis e complessis e la plui part a clamin in cause i insegnants, la lôr culture educative, lis lôr cognossincis dissiplinârs e linguistichis, lis lôr competencis didatichis, e soreduòt la lôr adesion personâl a superâ la tradizional division tra dissiplinis. Il program di ricerche culi presentât al à fat cualchi pas in cheste direzion; lis esperiencis fatis però si son fermadis su la puarte de classe sperimentalâ. Par che une scuele e sei indreçade ae educazion plurilengâl e interculturâl, par che lis scuelis furlanis de infanzie e primariis – e no nome lôr – a adotin cheste prospetive educative, il curriculum al à di vê par principi e obietîf fondamentâl il potenziament de competence plurilengâl e interculturâl dai fruts e il disvilup de sensibilitât, dal rispiet e de curiositat tai confronts des lenghis, di dutis lis lenghis, e al à di presentâ une coerence orizontâl te integratzion tra i insegnaments linguistics des classis e une coerence verticâl, une continuitât e evoluzion tal percors di istruzion. L'insegnament/aprendiment de lenghe furlane tant che lenghe dai fruts di cheste region al à di ciatâ puest in chest disen e al à di jessi element struturâl dal progetto formatîf. Si trate di un cambiament curiculâr di no pôc cont. La sô realizazion e il so bon esit a dipendin de disponibilitât dai insegnants a modificâ il mût di lavorâ e a superâ i confins de lôr dissipline par vierzisi a colaborâ cui docents des diversis materiis, e de lôr capacitât di adotâ modalitâts didatichis atentis ae dimension linguistiche dai aprendiments. No son cambiamenti di pôc cont; a domandin impegn e une culture educative buine di fâ front aes domandis di formazion de societât europeane atuâl che i son costitutîfs la pluralitât e la diversitât culturâl e linguistiche, la mobilitât, il cambiament. Al pâr di podê dî che cence une adeguade formazion dai docents, la educazion plurilengâl e interculturâl no je cussì facile di realizâ.

¹ Il studi no tratât chi al è stât indreçât al *Insegnament des lenghis: furlan, talian, lenghe foreste te scuele medie cun modalitâts CLIL*.

² Responsabile scientifice e coordinadore dal program di ricerche je stade la Autore de chest scrit, Alessandra Burelli, ricercadore di Didatiche des lenghis modernis. La implementazion dal program e je stade judade de dotore Sara Cantarutti, titolâr dal assegno di ricerche finanziât de ARLeF e insegnante te classe sperimental de scuele primarie di Travês (PN).

³ E fâs part dal 4[^] Circul didatic di Udin.

⁴ E fas part dal Istitût Comprensif (I.C.) di Faedis.

⁵ E fâs part dal I.C. di Buje.

⁶ E fâs part dal I.C. di Feagne.

⁷ A àn realizât i percors didatics sperimentâi lis insegnantis: Marisa Comelli, Emanuela Vidic e Loredana Basso te Scuele primarie “D. Alighieri” di Faedis; Sara Cantarutti, Daniela Florit e Lorenna Zancan te Scuele primarie “D. Cernazai” di Travês; Angela Tuniz te Scuele primarie “G. Carducci” di Udin; Patrizia Liva e Daniela Valvasori te Scuele de infanzie “Marin” di Cjasiat; Ornella Piccoli te Scuele de infanzie di Madris di Feagne; Marisa Scuntaro te Scuele de infanzie “Amicizia Mantovana” di Trep Grant.

⁸ La dotore Sara Cantarutti.